

La leç 546 dal 1977 e ricognòs lenghe, storie e culture di chenti tant che principis di fonde

Universitât simpri plui furlane

Belanç dai prins 30 agns dal nêstri Ateneu

Al covente un leam fuart cul territori

di FEDERICO VICARIO

Tantis a son stadis, ta chei dis achì, lis manifesta-zions e lis celebrazions pai prins trente agns di vite de Universitât dal Friûl. L'Universitât e je stade istituide, di fat, in graziis de leç statâl numar 546 dal 1977, par dâ rispueste ae straordinarie mobilitazion di popul che le à domandade – il Comitât pe Universitât furlane dal professôr Tarcisio Petracco al veve tirât sù 125.000 firmis – e, par prionte, cuntun compit pardabon impuartant: la nestre e je l'uniche tra lis universitâts talianis ch'è a di ocupâsi no dome di ricercje scientifiche e di alte formazion, come dutis chês altris, ma ancje, come ch'al dis l'articul 26 de leç istitutive, di «contribuî al progrès civil, sociâl e ae rinassite economiche dal Friûl, e di divignî imprest organic pal disvilup e pal rinovament dai riui originaris de culture, de lenghe, des tradizions e de storie dal Friûl». La disposizion normative, metude in vore dal 1978, l'an daspò, e marche duncje un particolar rapuart, une vore strent, tra l'Universitât e il so territori di riferiment, il Friûl, domandant un impegn fuart a pro de incressite culturâl, civil e economiche di dute la comunitât regionâl.

L'ocasion dai trente agns dal nêstri Ateneu e cole intun moment no facil de vite des universitâts – lis cronachis a son plenis

di intervents ch'a pandin la preocupazion dal mont academic talian pai tais dai finanziaments ordenaris a didatiche e ricercje – une ocasion par rifletî su la situazion prisint, però, ch'è a viodût lis miôr fuarcis de societât strenzisi di gnûf ator di une des istituzions che di plui a rapresentin la volontât di riscat dal popul furlan e la sô sperance pal avignî. Un gnûf pat tra l'Universitât e il Friûl al è duncje stât firmât, la setemane passade, tra i plui impuartants sogjets de region, par sigurâ a cheste istituzion, ancjemò une volte, la poie e il jutori, morâl e materiâl, ch'a coventin par garantînt l'assolude autonomie e une salde prospettive di disvilup.

I risultâts otignûts dal Ateneu furlan, in trente agns, nus metin ai prins puescj in Italie pe cualitât de didatiche e de ricercje, pe produzion scientifiche e pe inovazion, pai procès di trasferiment des cognossincis ai sogjets economics e produtifs dal territori, pal nivel di internazionalizazion. E je une Universitât zovine e dinamiche, la nestre, che no à pôre di confrontâsi e di misurâsi cu lis altris realtâts academicis talianis, plui o mancun vicinis, cul mont de globalizazion, cu lis disfidis di un cuadri di riferiment in continue evoluzion. So-

redut, e chest lu à dit a fuart ancje la Retore Cristiana Compagno, l'Universitât dal Friûl no domande plasês o regâi, rispiet a une situazion finanziarie simpri plui grivie, ma e domande, chel sî, di jessi valutade su la fonde di ce ch'è a savût esprimi e produci, di jessi judicade cun criteris di obietività e di ecuitât e di rivâ a vè il just ricognossiment par ce ch'è vâl. No si trate duncje di difindi renditis di posizion, al contrari: si trate di competî cun chei altris sogjets dal mont academic regionâl e nazional par otignî l'atenzion e la considerazion che si mertin, rivant a vinci l'oposizion di chês fuarcis che, magari cussì no, a lavorin dome par interès personâl e cuintri dal interès comun.

Tornant un moment ae mission fondative de Universitât, nonus reste che confermâ la sperance di viodi simpri plui centrâl, tes ativitâts de istituzion, l'atenzion pal mont de culture furlane, pe cuestion de lenghe, de storie, des tradizions, dal ambient e di dut chel complès di valôrs ch'a componin l'identitât dal nêstri jessi furlans. Il Centri interdepartimentâl di ricercje su la culture e la lenghe dal Friûl (Cirf), lis facultâts e chês altris struturis academicis a àn di metisi simpri plui in rapuart e al servizi dal territori, proponint

lis soluzions che la comunitât regionâl di timp e domande.

O pensin, ma si trate dome di dôs des cuestions ch'a van frontadis e definidis prime ch'al è pussibil, al grant probleme de scuele furlane, cu la formazion dai insegnants e cu l'istituzion di un Centri di documentazion pe scuele, ch'al meti adun e ch'al promovi impescj e materiâl didatics par trasmeti cognossincis e competencis ai furlans di doman, e al no mancun impuartant probleme de lenghe furlane. L'Universitât e à di mostrâ la sô autoritât in cuestions ch'a rivuardin il studi, l'ûs, la promozion e la valorizazion de lenghe furlane, la produzion di repertoris lessicografics, dai imprescj ch'a coventin pe descrizion des struturis de lenghe e pe comunicazion istituzionâl e di ogni dì.

L'Universitât in Friûl le vin. O vin di fâle diventâ, cumò, simpri plui furlane.



Palaz Florio a Udin, sede de Universitât dal Friûl